

鳩茲行紀

古水

辛卯年四月初四 / 2011-05-06

蕪湖者，江東米市，古都會也。舊有鳩茲之名，昔楚子重伐吳之地，水陽江陰有殘丘，疑故邑所在。地卑溼，瀦淤澤泊，多生蕪藻，人名之曰蕪湖。（今攷之非是，「蕪」迺吳越古語發語字，如「蕪湖」、「無錫」、「餘姚」、「餘杭」、「姑孰」、「姑蘇」皆此類。）

余于姑孰居久矣，然蕪湖風物未曾覽，嚮往亦久矣。友人傳隆、麗娟、媛媛、晨、培群等皆負笈鳩茲，行將肄業，語予曰：「不來將返。」乃始成行。

諸友就學之安師大，乃敬敷書院苗裔。民國時皖江新建之第一高校，曰國立安徽大學，于京滬表裏，徒遜同濟，時移勢遷，遂尋址鳩城，今之師大也。校區南北各一，其北者赭山，舊置；其南者花津，新築。

余去時失路，幸逢麗娟，與之同乘至花津，始見諸友。師大恢弘壯麗，花津縱貫其間，津上曲橋臥波，兩岸近觀則垂柳滴翠，汀蘭齊放，遠望則樓宇聳峙，秩序嚴然，余未嘗不憾大外不及什一也。

余匆匆過客耳，未及細察，然觀之圖書館，浩若煙海，洋洋大觀，各行各業，應有盡有。蓋以綜合大學，不偏不頗，殊無遺漏，羨之不已。

晨與余皆學俄語，舊為同學，今又同行，倍是親切。今歲春闈，晨榜上有名，將赴蘇大，余以之為快事，謔其必當有宴。遂犒余等，盡歡而散。媛媛有事不能至，甚憾。

午後諸友合議，赴赭山一遊，一曰其為老校區，二曰景致絕卓。至則歎服，實副其名，樹叢茂密，樟香沁脾。偕登赭山，山道兩翼花木甚蕃，但得其香，不能盡識。上有琴房，琴音清樾。晨讚不絕口，曰：「此真讀書之最善地，無怪乎人才薈萃于此。」及下山，麗娟著高跟鞋，步履遲緩，傳隆戲曰當脫屣而行，諸人大噱。

鳩茲之行不過一日，然所見所得頗足留戀。